

Xujun xi tjun kits'ínntu nda postru Pedro

B'i ts'ín kikjaniñaha Pedro xuta ninku

¹ An Pedro, an nda postruhu Jesucristo títs'inkjínuu xujuin jun xi j'ájinnuu Ntíaná. Jun xi kindzjoyo ante Ponto nga tinimasún, ko ante Galacia ya, ante Capadocia, ante Asia ko ante Bitinia.

² Kikie tíjunnuu Ntia Na'miná, kui nga j'ájihinnuu ko Espirituhu kits'ín jenuu, tu xi kuinú'yá'éhen ruu Jesucristo ko tu xi tu ngat'aha jinihí Jesucristo kjuáts'ehenuu Ntíaná.

Kas'e nkjúnnuu kjuanda ko kjuajyu.

*B'i ts'ín tsakúya Pedro ni xi ñá tjeñenná nga
kuichú nistjin xi fekuu*

³ Kan'etsjohó Ntíaná xi Ntíaha ko Na'mihí Nda Ntíaná Jesucristo. Ngat'aha kjuanimatak'un chánkaha kits'íntsin tsetse ngáhaná nk'ie nga kits'ínkj'áíya ngáha ra Jesucristo ajihin xutak'ien. Kui nga tichuyáhaná nga kuintsuba tík'aán ko ñá

⁴ ko nga n'ekjálhín ni xi tsjáná, ni xi najmi maha batsun ko najmi ma chuntí ko najmi maha 'meya, ni xi títjohó ndjiojmi ján ngandanuu.

⁵ Nga'yúhún Ntíaná tókunkohonuu tu ngat'aha nga s'ejinnuu. At'aha tjíndaha yjohó Ntíaná nga kuakúchji xi nkú ts'ín ts'íink'anki xuta xi ts'e nistjin xi fekuu.

⁶ Kui kjuaha nga kitsejihinnuu kjuatsjo, ndaha tsa chuba nistjin tjihin nga n'e nibanenuu nkjin tikja ni xi kuitjajun.

⁷ Kui xi kuakuchji yaha jun nga kjuaxi. At'aha nga s'ejinnuu, kui xi 'yun chji saha ra nga toonsinee. Ndaha tsa maha batsun toonsinee, tunga chasehe ra tu xi s'ejna chjiji tsa kui kjuaxi. Ko nk'ie nga s'ejna chji xi nkú ts'in s'ejin kjuaxinuu, nda ts'in chubayanenuu ko sakunuu kjuachanka ko nda k'úinnuu nistjin nga kj'uaikuchji yoho Jesucristo.

⁸ Tjonuu Jesucristo, ndaha tsa najmi yo nkú tjín. Ko ndaha tsa najmi tíyo nd'ai, tunga s'ejihinnuu ko tjinnuu kjuatsjo xi tjihin kjuachanka, xi najmi yaá xi nkú ts'in bixiyaá.

⁹ Tjinnuu kui nij at'aha tsakunuu nga tin'ek'ankinuu, kui xi nibaha ra ngat'aha nga s'ejinnuu.

¹⁰ Já profeta xi kis'e nistjin nk'ie, xi kitsúya titjun kjuanda xi sakunuu, kui xi kits'innkjink'un nga kama chubayaha xi nkú ts'in k'uan'kihi xuta, at'aha mjehe skue kui nij.

¹¹ Kama mjehe nga incha skue ya xutaha ko mí nistjihin xi y'ejna chji Espirituhu Cristo xi y'ejnajihin já profeta nga kitsúya titjuhun kju'un xi tjihin nga skue Cristo ko nga askahan s'e kjuachanka.

¹² Tunga Ntjanáhá tsakúchjiji já profeta xu'bo nga ni xi tincha tsuya najmi kui kamats'e, nga ní ngandanuu b'a kitsúhu. Kui niu xi ta kitsúyanuu já xi y'énijmínuu én nda tsuhu Jesucristo. Nga'yuhun Espiritu xi kin'e nibaha ndjiojmi ján y'énijmihinuu.

Ko ta ntítsjee mje nkjúhún nga skue nkú tjíhín ra ni xu'bjí.

B'í ts'ín tsakúya Pedro nga tintsuba ndaá at'aha Ntíaná ja ts'ená

¹³ Kui b'a maha, chasę sisihín ruu xi nkú n'oo. Nda n'enkjíntak'un ko chúya k'un'k'uhúun kjuanda xi kj'uaítsjánuu Jesucristo nístjin nga kuakúchji yjoho.

¹⁴ B'a n'oo xi nkú ts'ín ntí xi nt'één. Najmi ta n'ehenu xi nkú ts'ín kinchja animanuu nístjin nk'ie, nk'ie nga najmi kjee yo Ntíaná.

¹⁵ Tsje katumo nginkun Ntíaná, xi nkú ts'ín tsje xi j'ájinnuu.

¹⁶ At'aha b'í ts'ín tjít'a éhen Ntíaná: “Tsje katumo, at'aha tsjená.”

¹⁷ Xihí “Na'mihí” bixíhuun xi ngúsuhún basehe tsa nda ko tsa najmi nda ni xi ts'ín nga nkúnkú xuta, kui nga kas'enuu kjuabinkjuhún xi nkú ts'ín kuankínkoo yjonuu nk'ie nga tinimasún so ei asunntej.

¹⁸ Yo nga kis'echjintjainuu tu xi kama ndaíhínuu nga chuba tintsubanú. B'a ts'ín tintsuboo nk'ie at'aha kui nihi xi y'éjñanuu ntje chánuu. Najmi toonsine ko tsa toontaba kin'echjén nga kis'echjintjainuu, ni xi maha batsun.

¹⁹ Jníhi ní Cristo kin'echjén, kui xi 'yún chjí. Xi nkúhu nku chutsanká kama Cristo, chutsanká xi najmi chumi nihi xi k'uhún ko xi najmi uhún.

²⁰ Kintehe ni nga kamanda asuntee kis'enda tíjün ni xi ts'ín Cristo, ko nístjin feku xi kich'aá nd'ai j'aikúchji yjoho ngandanuu.

²¹ Ngat'aha Cristo s'ejihinnuu Ntíaná, kui xi kits'ínkj'áiya ngáha rá Cristo ngabayoo kó kitsjáha kjuachánka. Kui nga tín'e s'ejihinnu kó tíma 'yún tak'uhunnu Ntíaná.

²² Nd'ai ni nga ja kamaje animanuu at'aha kinu'yá'óhooon én xi naxu tjin kó nga tu xí ndahá ts'ín tjíyanuu nga n'etjó xuta ninku, kui nga ngayjee animanuu n'etjohonu xinkiu.

²³ At'aha ja kitsin tsetse ngáhanu. Najmi kitsiun xi nkú ts'ín tsin xuta xi maha 'me. Éhen ní Ntíaná kits'íntsin tsetse ngáhanuu. Kui xi fi ndju. Najmi kamaha kfe.

²⁴ At'aha b'i ts'ín tjit'a xujun éhen Ntíaná:

Ngayjee xuta, xi nkú joyaha jñá xi tjin.

Kó ngayjee kjuachánkaha xuta,

xi nkú joyaha naxúhu jñóo.

Xi jñóo kó jne naxúu,

²⁵ tunga éhen Ntíaná santaha tu nkjéhé ni ngjuai ndju.

Kui éen, kui én nda tsu xi ja kis'enjímí ajinnuu.

2

¹ Kui b'a maha, n'e t'axíhinu ngayje kjuach'onk'un, ngayje ni tsank'á, kjuajohonkin, kjuaxintak'un kó ngayje tíkjá kjuachubatit'ain.

² Katumo xi nkú joyaha ntínta xi mje nkjühun ntáchiki. B'a ts'ín katuma mjenuu én xi ndoo. Kui xi tsjá nga'yúhun kjuankjintak'unnuu, tu xi b'a ts'ín saáhanu santaha nkúhu nga kjuáts'e sínnuu Ntíaná.

³ Xihí jahá kichjut'o ngandaha Nda Ntíaná.

B'i ts'ín tsakúya Pedro nga nku ndio k'aku kits'ín ma Jesucristo nga y'éjña chubaya

⁴ Nibák'un tiñoḥo Nda Ntíaná, kui xi nkú joyaha nku ndjio xi tíjña tík'un. Kikjaníya xuta ndjio xu'bo, tunga Ntíanáhá j'ájin ndjio ko nginkun Ntíaná 'yún chjíhi ra.

⁵ Jun xi nkú joyaha ndjio xi tíntu tík'un, xi kin'endakoho nku ninku xi najmi asunntee y'aha ra. Kin'e manuu já na'mi jehe Ntíaná xi tsjáha chje Jesucristo, chje xi nk'a ján tjehe ra. A Ntíanáhá tí'boho kui chje nga b'a tín'o, kui chje xi sasihin Ntíaná.

⁶ At'aha b'i ts'in tjit'a xujun éhen Ntíaná:
An k'uejñá nanki Sion nku ndjio k'aku,
xi j'ajían ko xi 'yún chjí.
Ndahachí najmi sakúhu kjuasuba
xuta xi s'ejihin ndjio.

⁷ Ngat'a ts'ajun xi s'ejinnuu Nda Ntíaná, chjíhi ra kui ndjio. Tunga xi najmi s'ejihin, bitjusun má nga b'i ts'in tjit'a xujun éhen Ntíaná:
Ndjio xi kikjaníya já chjinexjóo,
kui xi ja j'ai ma ndjio k'aku.

⁸ Ko b'i ta títsu ya:
Tsichu ma nku ndjio xi ts'in saténki xuta,
nku naxi xi ts'inxuntuhu.
Saténki xuta xu'bo ngat'aha éen, at'aha najmi nt'é'éhen éen. B'a maha xuta xu'bo at'aha ja b'a ts'in tíjña nga b'a kamaha.

⁹ Tunga máha jun, jun xi xuta xi kichj'ajin, jun já na'mi xi ts'inxát'aha xi batéxumaha nk'a ján, tsjenú jun xi xuta naxinantáha Ntíaná, xuta xi ja tsichu ma ts'e Ntíaná. B'a kin'e manuu tu xi kuxínyahanu xi nkú ts'in chánka xi j'ajinnuu. At'aha Ntíaná j'ajinnuu nga kuitjujiun má jyuun ko nga kuitjás'enjiun má nga ts'in ndzjen kjuachánkaha.

10 Nistjin nk'ie, najmi xuta naxinantá kik'innuu, tunga nd'ai ja tsichumo xuta naxinantáha Ntíaná. Ko nistjin nk'ie najmi kichase nimanuu, tunga nd'ai ja tichase nimanuu.

B'i ts'in tsakúya Pedro xi nkú ts'in tjihin nga kuankikaá yjoná ajihin xuta xi tjín asuntei

11 Tjona jun, já nts'e. Tíbankinuu nga t'ech'óhoo yjonuu xi nkú ts'in mjehe animanuu. At'aha kui ni, kui xi tifi kontranuu. Yo nga xin nankinuu ko tu tίνimasúnnú ei asuntei.

12 Tu nku kixihí tankínkoo yjonuu ajihin xuta xi najmi be Ntíaná. B'a n'oo ndaha tsa b'a incha kuitsu nga najmi nda tίν'o. Tunga incha skuéhé ni nda xi n'oo ko ts'íintsjohó Ntíaná nistjin nga kuanki kuenta.

13 Ngat'aha nga Nda Ntíaná ts'enuu, kui nga chankjúhunnu ngayjee já xi tjihin xá ei asuntei. B'a n'oo nginkun nda titjun k'aku Roma

14 ko b'a n'oo nginkun já k'aku xi b'éxá nda titjun k'aku nga ts'innijéhe xi ch'on ts'in ko nga kjanínka xi nda ts'in.

15 At'aha mjehe Ntíaná nga n'oo ni xi nda. B'a ts'in k'úéchjahanu ts'a xuta xi najmi be Ntíaná ko najmi mankjihin ni xi ts'e.

16 Ndaínuu yjonuu nginkun Ntíaná, tunga najmi tu n'echjénnú kjuandaínuu tsa k'uaintohoo yjonuu nga n'oo ni xi najmi nda. Tu sa ní tintsuhoo xi nkú ts'in b'entu xuta xi ts'inxát'aha Ntíaná.

17 Chankjún ngayjee xuta. N'etjó xi ta Ntíhi Ntíaná. Chankjún Ntíaná. Nuú'yá'óhooon nda titjun k'aku Roma.

B'i ts'ín títsuya Pedro ni xi tjíhin nga ts'ín xuta musu xi kich'atse

18 Jun xuta musu xi kich'atsenuu, chankjún já ntianuu kō nuú'yá'óhōon, najmi tū suba xi nda tjiyahā kō xi ma nimahā jun xi b'a n'ekoo. B'a ní ta n'ekoo xi kjan ts'ínkonuu.

19 At'aha nda nginkun Ntíaná nga ts'ín chúkjuā jámusu kjuā'un xi tí'ajin, ndaha tsa najmi tjíhin nga kjuājin niu kai, tunga ts'ín chúkjuāhá at'aha ja kitsjáha yjohō Ntíaná.

20 Tunga tsa ch'on t'n'o kō tsa as'ai tít'sín'unnuu já ntianuu kō t'n'echjúkjuo, ¿mí ni chánkaha xi t'n'o ma? Tunga tsa nda t'n'o kō as'ai t'n'e chúkjuo kjuā'un xi tíbitjájún, kuihí ni xu'bi xi nda nginkun Ntíaná.

21 J'ájinnuu Ntíaná nga n'oo ni xi nda kō nga n'e chúkjuo ní xi tū kjuandahá kuitjájün, xi nkú ta kits'ín Cristo nga un kíkíehē ngandanuu. Y'éjña chubayanuu, tū xi b'a ta n'ehenu.

22 Najmi kits'ín ngatitsun kō najmi kik'anacha.

23 Nk'ie nga ch'on kik'ihin, najmi ch'on ts'ín kits'ínk'óya. Nk'ie nga un kíkíehē, najmi b'a kitsú nga k'uasje chjí ni xi t'n'ehe. Tū sa ní aya ntsja Ntíaná y'éjñaya yjohō, at'aha kui xi kixi ts'ín kjuā.

24 Kui kikjin kik'anji ngatitsunná nga kis'et'a kruu. B'a kits'ín tū xi kuayáha raá ngatitsuun kō naxu n'eé nga kuintsubaa. Kō tū ngat'aha nga kin'e'uhun Cristo, kui nga kin'enkihinnuu.

25 Nístjin nk'ie xi nkú joyaha chuťsankā xi ngji t'axín kamo, tunga nd'ai ja kik'óyak'un ngáhanu Ndā bastuu, kui xi kunnuu.

3

B'i ts'ín títsuya Pedro xi nkú ts'ín tjihin nga k'úéntukō xinkjín xuta

¹ Kō jun xi tí'minuu jminchjín, chankjún x'innuu. B'a ts'ín ni xi n'ehenu ts'íihin nga s'ejihin Ntíaná x'innuu. Najmi ni xi chubo ts'ín nga s'ejihin x'innuu.

² Skue xi nkú ts'ín naxu títbankínkōo yjonuu kō nga tíyankjún Ntíaná.

³ Najmi tū tsjo n'ek'íésunk'o yjonuu, tsa nihi xi nkjún ts'ín k'úéndo ntsjanuu kō tsa nihi xi nkjún ts'ín ngjúát'o tōonsine kō tsa najyun xi 'yún chjī ndyjoo.

⁴ Tū sa ní ajin animanuu kas'e kjuatsjotjín xi najmi mahā feya, kui xi tsuhu rā nga nda kas'eyanuu kō najmi stinta. Kui ni xu'bī xi 'yún chjīhī rā nginkun Ntíaná.

⁵ Njstjin nk'ie b'a ts'ín y'énda yjohō jminchjín je xi kis'e. Kui xi kama 'yún tak'un Ntíaná kō incha kikienkjún x'ihin.

⁶ Xi nkúhu Sara, kui xi kint'é'éhen Abraham kō “Chá Ntiana” kitsúhu. Tsa ni xi nda n'ehenu kō najmi kuinkjún ni xi kamat'on, jun xi ntíhī Sara b'a.

⁷ Kō jun xi tí'minuu jáx'in, n'enkjínk'un sisiun xi nkú ts'ín kuintsuḅakōo chjuúnnuu. Chankjún at'aha najmi ndjá tjíyaha xi nkúhu jun, kō at'aha jun kō kui tā űja n'ekjáínkōhōo kjuandaha Ntíaná nga kuintsuḅa tík'un. B'a ts'ín tintsuḅakōo tū xi najmi chumi nihi xi k'uéchjaha rā nga chubakōo Ntíaná.

B'i ts'ín tsakúya Pedro xi nkú ts'ín tjíhin nga kuintsubaá

⁸ Kó ni xi fekuhu, nda ts'ín tintsuakoo xinkiu. B'i ngján chase nímohoo kó n'etjǒ xinkiu at'aha nts'o mahanu. N'e'yún tak'un xinkiu kó nímakjua katumo.

⁹ Najmi tu n'es'echjiú tsa ch'on t'n'enuu kó najmi tu én ch'on tsu n'ek'óyo tsa ch'on tí'minu. Tu sa ní chubantjǒ nginkun Ntíaná xi nkú títs'innuu, at'aha tu xi nda ts'ínkohonu Ntíaná, kui nga kichj'ajihinnuu.

¹⁰ At'aha b'i títsu xujun éhen Ntíaná:

Xi mjehe ts'íntjo nístjin xi y'a,
kó mjehe nga tsjo ts'ín kj'uaaha nístjin,
kui xi kat'éch'ohó njai én ch'on tsu,
kó najmi tu katitju ts'a én tsank'á.

¹¹ Kats'ín t'axíhin yjohó kjuach'onk'uun,
kó kats'ín ni xi nda.

Katangisjai kjuajyu kó kat'ejñajin.

¹² At'aha Ntíaná basehe xuta xi naxu ts'ín,
kó nda basínñjuhu ni xi 'mihí nga chubako,
tunga fi kontrahá rá xi ch'on ts'ín.

B'i ts'ín tsakúya Pedro xi nkú ts'ín s'eyaná tsa kjuanimá kuitjáián

¹³ ¿Yá xi ch'on ts'ínnuu tsa ngayjehe k'un n'oo ni xi nda?

¹⁴ ¡Á b'a nda tjíhin ts'ajun tsa nk'ie nga t'n'o ni xi naxu tjín t'íbitjáiún kjuanimá! Najmi tu binkjun xuta kó najmi tu nkjún manuu.

¹⁵ Tu sa ní chankjún Cristo ajin animanuu, at'aha kui xi Nda Ntíanuu maha. Kó tintsuba ndo nga kamanuu k'úinyohoo xi ngjuásjaiyanuu ngat'a ts'e kjuanda xi tichuyóhoo.

16 Tunga n_im_ak_ju_ah_a n'eso yjonuu ko ch_ank_jún jóo nga b'a n'oo. Najmi t_u ch_umi ni ch_ub_a n'ek'anjiu yjonuu, t_u xi nk'ie nga ch_ubayanéhenuu k_ju_as_uba kasakúhu r_a xi t_inch_jatit'ainnuu ngat'ah_a xi nkú ts'ín n_ax_u t_ibankínkoo yjonuu nga yjankiu Cristo.

17 Tsa ni xi k_ju_an_im_a t_ibitjaj_ihinnu, b'a katuma tsa Nt_ianá b'a ts'ín mjehe. Tunga ngat'ah_a ní nga nda t_in'o b'a katumanuu, najmi ngat'ah_a nga ch'on t_in'o.

18 At'ah_a kui nihi xi t_a j'ajin Cristo. Nkuhú n_iy_a k'ien t_u xi kits'ínndy_jajnuhu ngatitsuhun x_ut_a. Xi n_ax_u nginkun Nt_ianá un k_ikiehe ngandah_a xi najmi n_ax_u nginkun Nt_ianá. B'a kamah_a t_u xi ngjikohoná nginkun Nt_ianá. Kui xi ngat'a ts'e yjonintehe kin'ek'ien tunga ngat'a ts'ehé es_pirituh_u kin'ek'_jáiyah_a.

19 Ko es_piritu nk'ie nga ngjik'iénijmíhi xi ja k'ien xi kjintuyá'yún,

20 xi najmi kint'é'én n_istjin nga y'ejña Noe nk'ie, kui n_istjiun nga tsakúch_i k_ju_atsentah_a Nt_ianá nga kikuyá tsa ng_ju_aik_j'áh_a r_a an_imah_a x_ut_a nk'ie nga t_its'ínnda tsutsu chánkoo Noe. Jin mahá x_ut_a xi kits'ínk'ankih_i ntóo nk'ie nga incha jas'en tsutsu chánkoo.

21 Ntóo y'ejña ch_i títjun xi nkú ts'ín kits'ínk'ankinuu ntánijuo nk'ie nga saténtáá. Tunga nk'ie nga saténtáná, n'ek'ankiná at'ah_a j'áiyah_a Jesucristo ngabayoo. Najmi saténtáá tsa t_u xi ch_juxíhin k_ju_achuntíhi yjonintená. B'a ní n'ená t_u xi t_ibinchisjáihiná nga je s'eyahaná nginkun Nt_ianá.

²² Ngjinji Jesucristo nk'a ján kō tǐjñat'ahā Ntǐaná. Nt'é'éhēn ntǐtsjee, xi tǐjín yahā xá kō xi batéxuma.

4

B'ǐ ts'ín tǐtsuya Pedro ni xi k'úéch'ohó yjoná

¹ Tǔ ngat'ahā nga un kikiehe Cristo nga kik'a yjoninnte, kui nga tjeheñ ruu yjonuu nga tǎ kui niu xi kj'ujǎin. At'ahā xutǎ xi ja j'ajǐn kjuanǐma, kui xi ja y'éjña ngatitsuun.

² B'a incha kits'ín tǔ xi nǐstjin xi k'ua saha najmi tǎ k'úéntuhu xi nkú ts'ín nchjahā anǐmahā. K'úéntu ní xi nkú ts'ín mjehe Ntǐaná.

³ Ja j'a xi nkú n'e tintsuḅoo nǐstjin nk'ie, nk'ie nga kin'o ni xi tsjohō xutǎ xi najmi be Ntǐaná, kō kik'aintohoo yjonuu nga kin'o tǔ mí nihí ni, kō kin'o ni xi nchjahā anǐmanuu, kō kama ch'iu, kō kik'ohoo kjuatsjo anǐmanuu, kō tǔ nku kjuatsjohó kama mjenuu, kō kiyankjún ntǐa ch'onk'un xi ts'ínnda xutǎ.

⁴ Xutǎ xu'bo najmi mankjihǐn á najmi tǎ n'ekohonu ni ch'onk'un xi tǔ ni xǐ jahá kits'ínkjas'ehēn yjohō. Kui nga nd'aj ch'on ts'ín nchjayanehēnuu.

⁵ Tunga tǐjǐhǐn ni nga ts'ǐnkjas'en kuenta nginkun Ntǐaná. Kui xi ja tǐjǐndahā yjohō nga kuasehe mí nihǐ xi kits'ín nga nkúnkú xi tǐjǐntu tǐk'uun kō xi ja k'ien.

⁶ Kui kjuaha nga tǎ kis'enǐjmǐhǐ rǎ xi ja k'ien én nda tsuhu Ntǐaná, tǔ xi k'úéntu tǐk'uhun espirituhu xi nkú ts'ín mjehe Ntǐaná, ndaha tsa ja kichasehe xi nkú ts'ín y'entu asuntee.

B'i ts'ín tsakúya Pedro nga nda n'exákaá ni xi kitsjáná Ntíaná

⁷ Ja tíbichú tiña nístjin nga n'ekje ngayjee ni xi tjin. Kui nga chasē sinsihin ruu ni xi n'oo ko najmi tu n'ekj'áíyo nga chubakoo Ntíaná.

⁸ 'Yún mjena nga n'etjō xinkiu, at'aha kjuatjoo nkjin nkjún ngatitsun ts'ínndyjajnu.

⁹ N'ekjōhoon xinkiu ni'yanuu ko tsjo kat'enuu nga b'a n'oo.

¹⁰ Xi nkú nga ts'ín xki kjuanda xi kin'ekjōhoon nga nkúnkú, b'a ts'ín n'e chjónjihjin xinkiu kui niu. Ngandaha xinkiu katumachjén kjuandoo, at'aha tjihin nga nda n'e chjón nga nkúnkú kjuandaha Ntíaná xi kin'ekjas'ennuu.

¹¹ Tsa tjin xi kuinchja, én xi títsjáha Ntíaná kui xi kanchja. Tsa tjin xi kuasinko xuta, katasinko xi nkú ts'ín tijná nga'yún xi títsjáha Ntíaná. B'a ts'ín ajihin ngayjee ni xi n'oo sakúhu ra kjuachánka Ntíaná. B'a kama at'aha Jesucristo yankiu. Kui xi kas'ehe kjuachánka ko nga'yún santaha tu nkjéhé ni. B'a katuma.

B'i ts'ín tsakúya Pedro xi nkú ts'ín ndjá kuinchajián ni xi ts'e Ntíaná

¹² Tjona jun, já nts'e. Najmi tu katuma nkjúnnuu ni xi tímat'on nga ndjá tíchjut'ayák'unnuu, tsa b'a kamanuu tsa ni xi kj'ái kui ni.

¹³ Tu sa ní tsjo kat'enuu nga tísakút'anuu kjua'un, kjua'un xi ta j'ajin Cristo, tu xi 'yún tse katumaha kjuatsjonuu nístjin nga kama chji kjuachánkaha Cristo.

14 Tsa ch'on tí'minuu at'aha Cristo yjankiu, já b'a nda tjíhin ts'ajun! At'aha Espirituhu Ntíaná tǎñajinnuu, Espiritu xi tjíhin kjuachánka.

15 Tjín xi un behe at'aha animá ts'ínk'ien, kò tsa ndyjé ts'ín, kò tsa ch'on ts'ín, kò tsa chuba tsungijihín yjohò kjuá xi tjíhin kj'ai xutaha, tunga najmi b'ahá katuma ajinnuu.

16 Tunga tsa tjín xi un tíbehe at'aha Cristo kits'ínkjas'ehen yjohò, najmi tu katuma subaha. Tu sa ní kats'íntsjohò Ntíaná at'aha Cristo tjenki.

17 Ja chuba nga kuatuts'ihín ra Ntíaná nga kuasehe mí nihi xi ts'ín xuta. Xuta xi ts'e k'uaaha ra. Tsa ná kuatuts'ínkohóná, ¿nkú sa ts'íhín xi najmi títs'ínkjáihín én nda tsuhu Ntíaná?

18 Tsa 'ni b'anki xi naxu ts'ín, ¿yá xi behe nkú k'úé ts'e xi najmi benkjún Ntíaná kò xi títs'ín ngatitsun?

19 Kui b'a maha, xi f'ajihin kjuanimá nk'ie nga Ntíaná títsjante, kats'ínkjas'en animaha aya ntsja xi kits'índaha, kui xi ma 'yún tak'aán, kò tu nkú ndahá kats'ín.

5

B'i ts'ín títsuya Pedro xi nkú ts'ín chasehe xuta nínkuhu Ntíaná

1 An xi ndachá ajihín xuta nínku. Tunkán kikiékohona kjuanimaha xi j'ajin Cristo kò ta an xi sakút'ana kjuachánka xi s'ejña chji ndyjun nkiní. Tíbankihí jácháha xuta nínku xi tjín ajinnuu.

2 Chúhūun chutsankaha Ntíaná xi kin'ekjas'ennuu. Chasohò, tunga najmi tu chasehé ruu xi nkúhu tsa kjuá'yún tín'ehenuu. Ngayje níhi k'un chasohò xi nkú ts'ín mjehe Ntíaná. Kò ta ndaha tsa toon mjenuu, tsa kui

kju_uaha nga ch_uase_her_uu. Ch_uaso níhi at'aha mjenuu nga ch_uaso_ho xuta n_uinku.

³ Najmi tu ndjá n'ekoo xuta xi kin'ekúnntanu. Tu sa ní t'ejña chubayohoo xi nkú incha ts'ín xuta n_uinkuhu Ntíaná.

⁴ B'a ts'ín nk'ie nga k'juaíkúchjhi yjoho Nda bastu k'aku, n'ekjóh_oon chjíhi kjuachánka xi najmi maha fe.

B'i ts'ín títsuya Pedro mí nihi xi ch_uaseéhe nga ku_uintsubaá

⁵ Ko ta jun xi tí'minuú já xunkú, t_ubankinuú nga ch_uankjún jácháha xuta n_uinku. Ngatento b'i ngján n_uimakjua n'esjo yjonuú nginkun xinkiu, at'aha b'i ts'ín tjít'a:

Ntíaná fi kontra_ha xi ngak'un,

tunga tsjáhá rá kjuanda xi n_uimakjua tjíntuyáha.

⁶ Kui nga n'e n_uimakjuahanu yjonuú kinte nga'yún chánkaha Ntíaná, tu xi kui k'uasjenk'ahanuú nk'ie nga kuichú chuba.

⁷ Ntíaná n'ekjas'ohoon ngayjee ni xi kjintahanuú, at'aha kui xi kjintaha rá jun.

⁸ Ch_uase chubayohoo ni xi n'oo ko t_uintsuba ndo, at'aha ndanindo_o xi nda kontra_u maha. Tsú'ba xi nkú joyaha xa xi t_ub'éntsji nga t_ubangisjai xuta xi kjine.

⁹ Tankín kontrohoo ko ndjá tinchajiun nga s'ejinnuú Ntíaná. At'aha yo nga ta kui kju_u'uhun xi títs'ín chúkjuá já nts'o xi tjín nga ngúsuhun asuntee.

¹⁰ Nk'ie nga ja un kabenuú chuba n_uistjin, Ntíaná kikjin, kui xi tsjáná ngayje t_ukjá kjuanda, kui xi Cristo kits'ínchén nga j'ájinná nga sakúná kjuachánkaha xi najmi maha feya, ts'ín nga

kamo xi tjihin nga kamo, tsjá nga'yúnnuu, ndjá ts'ínkinchánuu kó najmi ta tsufi kuinchahanu.

¹¹ Kui xi tū nkjéhé ni tjihin nga'yún. B'a katuma.

B'i ts'in kits'ínkje Pedro xujin

¹² Silbano xi nda nts'é xihin, xi kixi fiko xáha, kui xi tsasinkona nga kits'inntá xujin. Chubahá ni xi tibet'ánuu nga títsjaniyánuu kó tíxinya kixinuu nk'ie nga ni xi tjit'a ei, kuihí xi kjuandaha Ntíaná. Ndjá tinchajiun kjuando.

¹³ Títs'ínkinuu kjuasuniña xuta ninku xi tjin ante Babilonia. Kui xi ta j'ájihin Ntíaná xi nkúhu jun. Ta títs'ínkinuu kjuasuniña Marko, kui xi ntína xihin.

¹⁴ B'i ngján tsjo n'e súniohoo xinkiu.

Kas'enuu kjuajyu ngatento jun xi tintsujihun Cristo.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
e05183c2-7c34-5cdd-8c78-15ea51bd8cbb